

PRIVATIZACIJU USPORAVA POLITIKA

Usred započetih priprema za privatizaciju *Aluminijskog kombinata Mostar*, federalni ministar industrije i energetike **Vahid Hećo** poništio je odluku o privatizaciji i time stvari vratio na početak. Hećo je sasvim u pravu: započeta privatizacija Aluminijskog kombinata zbilja nije usklađena s postojećim privatizacijskim zakonima, no jednako tako morao je ranije poništiti i privatizaciju *Željezare Zenica*, *Energopetrola*, *Energoinvesta* i u svim drugim slučajevima gdje se privatizacija nije odvijala po važećim privatizacijskim zakonima nego po ad hoc procedurama iskonstruiranim za svaki pojedinačni slučaj.

Tako je naprimjer prodaja *Energopetrola* realizirana kombinacijom privati-

zacije i dokapitalizacije a cijeli postupak nije provela nadležna Agencija za privatizaciju nego posebna ad hoc komisija. Stoga je sasvim neumjesno kritizirati direktora Agencije **Rešada Žutića** zbog niskih prihoda ostvarenih od privatizacije budući da su se najkrupnije privatizacijske transakcije odvijale mimo njegove Agencije koja se dobrim dijelom svela na tehnički servis posebnih vladinih komisija. Tako i za prodaju Aluminijskog kombinata Mostar ili *Energopetrola* nije bio zadužen direktor Agencije Rešad Žutić nego vladini namjesnici **Hamdija Kulović** i **Kasema Čatović**.

Privatizacija državnog kapitala iz zakonskog okvira nije iskočila nedavno, kada je započeta privatizacija Aluminijskog kombinata Mostar, nego puno ranije, kada se u privatizaciju neovlašteno počeo petljati Hećin prethodnik **Izet Žigić** kome je politički vrh Stranke za BiH dao nalog da pod stranačku kontrolu stavi Fabriku duhana Sarajevo i još neke finansijski interesantne državne kompanije. Umjesto industrijom i energijom, Žiga se tokom trogodišnjeg mandata bavio isključivo privatizacijom: tragovi njegovih prstiju ostali su na privatizacijskim ugovorima za KHK Lukavac, Željezaru Zenica itd.

Šta je sporno u slučaju privatizacije Aluminijskog kombinata Mostar?

Hećo kaže da je sporna početna bilansa, ali zar početna bilansa isto tako nije bila sporna i u slučaju privatizacije Željezare Zenica kada je vrijednost državnog kapitala bila nekoliko puta umanjena kako bi se svela na stotinjak miliona maraka koliko je kuvajtska agencija KIA bila spremna platiti za 50-postotni vlasnički udio.

Hećina neočekivana intervencija u slučaju sporne privatizacije Aluminijskog kombinata Mostar sasvim zaslužno dobit će nepovoljnu nacionalno-političku konotaciju zbog očigledno selektivnog pozivanja na zakonitost. Naprimjer, prije godinu-dvije mostarski sud je poništio nelegalnu privatizaciju *Eroneta* preko "kompenzacijskih poslova", no nelegalna privatizacija Tuzlanske banke, čiji je kapital također privatiziran preko fiktivnih kompenzacija, za ministra Heću i njegove partijske kolege sasvim je nesporna. Od prodaje zeničke Željezare Vlada FBiH zaradila je jedan euro, a toliko će po svojoj prilici zaraditi i od prodaje Aluminijskog kombinata Mostar, no radnici u dvije kompanije prošli su sasvim različito: mostarskim je pripalo 44 posto dionica a zeničkim ni jedna!

GORENJE U DUBAIJU ZASTUPA NERMIN SALMAN

Nermin Salman, jedan od najsposobnijih bosanskih menadžera mlađe generacije, od prije nekoliko mjeseci preselio se u Dubai gdje je preuzeo predstavništvo slovenskog *Gorenja*. Salmanova "zona odgovornosti" prostire se na dvadesetak okolnih zemalja i obuhvata tržište od preko 400 miliona stanovnika. Prije prelaska u Gorenje, Salman je s velikim uspjehom vodio bosanski ogranak slovenske kompanije *Droga* i jedan je od najzaslužnijih Droginih menadžera za izgradnju tvornice *Argeta* pašete u Hadžićima koja je nedavno počela s radom.

Selmana je, prema vlastitom priznanju, iznenadila činjenica da je u Dubaiju "pustila korijene" prilično velika i pri tome vrlo uspješna poslovna zajednica ljudi s prostora bivše Jugoslavije, među kojima je i poneki Bosanac. Riječ je međutim o poduzetnicima koji su u Dubaiju osnovali vlastite firme bez bilo kakvih poslovnih relacija s BiH. Prema njegovom saznanju, ni jedna kompanija iz BiH još uvijek nema svoje predstavništvo u Dubaiju - uprkos neslućenim poslovnim prilikama koje se nude na tom tržištu koje doživljava nezabilježen ekonomski procvat.

RAST PLAĆA U FBIH I RS OSTAO NEPROMIJENJEN

Najave Milorada Dodika da će Republiku Srpsku učiniti ekonomski prosperitetnijim dijelom BiH za sada ne prate realni statistički pokazatelji. Dapače, razlika između FBiH i RS u posljednjih devet mjeseci ove godine ostala je skoro nepromijenjena, barem kada su u pitanju dva osnovna pokazatelja - rast plaća i cijena potrošačke korpe.

Naime, prosječna plaća isplaćena na prostoru FBiH u desetom mjesecu ove godine iznosila je 609 KM i potrošačku korpu je premašila za 122 KM, dok je prosječna plaća u istom razdoblju u RS iznosila 538 KM odnosno 72 KM više od potrošačke korpe.

